



Inatsisartuni ilaasortaq Andreas Uldum, Demokraatit
-/maani

Qeqertarsuarmi innuttaasut angallannikkut atugaat pillugit § 37 naapertorlugu apeqqummut nr. 2011-205-imut akissuteqaat

07. november 2011
Sagsnr. 2011-057207
Dok. Nr. 759318

Asasara Andreas Uldum

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Maannakkorpiaq angallanneq pillugu oqallinneq ingerlalluarmat ilittulli nuannaarutigaa. Uangami attaveqarnermut akisussaasutut suliasaqarfik taanna pissanganartutut pingaarutilittullu isigaara. Taamaattumik nuannaarutigaa tamanna aamma allat soqutigimmassuk, aammalu siunissami attaveqaatigut qanoq ilusilersussanerivut pillugu isummersomata.

Apeqqummik imaattumik Naalakkersuisunut saqqummiussivutit:

Qeqertarsuarmi innuttaasut angallannikkut atugaat pitsanngorsarniarlugit Naalakkersuisut sunik suliniuteqarniarlutik eqqarsarpat?

Qeqertarsuup maajip ulluisa 15-anniit novembarip ulluisa 30-annut imaatigut angallassinisaaq pillugu Naalakkersuisut Disko Linemut kiffartuunneqarnissamik isumaqatigiissuteqarsimapput, aammalu ukiup sinnerani Qeqertarsuarmut timmisartuussinisaq pillugu Air Greenlandimut kiffartuunneqarnissamik isumaqatigiissuteqarsimallutik.

Qeqertarsuup Aasiaallu akornanni marlungornikkut, tallimangornikkut sapaatikullu angallassisoqartartoq, aammalu maajip ulluisa 15-ata kingorna pingasoriarluni kinguartitsisoqarsimasooq, taakkulu tamarmik oktobarimi pisimasut Disko Line ilisimatitsivoq.

Disko Linemut aamma Air Greenlandimut kiffartuunneqarnissamik isumaqatigiissutit 2012-ip naanerata tungaanut atuuttussaapput, taamaattumillu maannakkorpiaq Qeqertarsuarmi innuttaasut angallannikkut atugaat allanngortinneqarsinnaangillat.

Kisiannili sila pissutigalugu kinguaattoornerit kingunerisaanik ilaasut bilitsiminnik annaasaqartarnerisa kipiluttunarnera pillugu Naalakkersuisut isumaqatigaatsit.

Tamanna pissutigalugu ilaasunik angallassinermi kiffartuunneqarnissamik isumaqatigiissutissat, 2013-imiit atuuttussat isumaqatigiissutigineqarnissaannut atatillugu Qeqertarsuarmi innuttaasut angallannikkut atugaat maannakkut kiffartuunneqarnissamik isumaqatigiissutaasunit pitsaanagerusumik ilusilerneqarsinnaanersut Naalakkersuisut misissorniartaat.

Allannguisoqassappalli taakku maannakut aningaasaqarnikkut sinaakkusiussaasut iluanni naammassineqarsinnaanersut apeqqutaassaaq.

Kiffartuunneqarnissamik isumaqatigiissummi angallassinermut pilersaarutiminik ataqatigiissaarinermini Aasiannut aqquatinut sapinngisamik naleqqussaanissamut Disko Line pisussaaffilerneqarpoq, tamannalu ingerlatseqatigiiffimmit aamma isumagineqarpoq. Kisiannili sapaatit akunnerannut aallartarnerit ullumikkut pingasuusut maannakut kiffartuunneqarnissamik isumaqatigiissutaasumi sinaakkusiussat iluanni amerlineqarsinnaanngillat.

Taamaattumik isumaqarpunga inuit Nuummiit Qeqertarsuarmukarniartut Nuummiit Aasiannut angalanissartik Qeqertarsuarnut – taamatullu aamma nunatsinni sumiiffippassuarnut allanut – ingerlaqqinnissamut naleqqussarlugu pilersaarusiortariaqaraat.

Neriuppunga matuma siuliani apeqqutit akisimassallugu, aammalu saaffiginnissuteqarnerit pillugu qutsavigerusuppakkit.

Inussiarnersumik inuulluaqqusillunga

Jens B. Frederiksen